



PRIMEIRO MINISTRO

**DISKURSU SUA EXELÊNSIA PRIMEIRU-MINISTRU
REPÚBLIKA DEMOKRÁTIKA TIMOR-LESTE,
DR. RUI MARIA DE ARAÚJO,
IHA OKAZIAUN JANTAR OFISIAL
FÓ ONRA BA SUA EMINÊNSIA KARDEAL PIETRO PAROLIN,
SEKRETÁRIU ESTADU SUA SANTIDADE PAPA FRANCISCO
NO LEGADO PAPAL**

**Palásiu Nobre Lahane
Loron 14 fulan Agostu tinan 2015**

Sua Eminência, Kardeal Pietro Parolin

Sua Exelência, Presidente Tribunal Rekursu

Sua Exselência, Ex-Titulares Orgaun Soberania

Sua-Exselência, Prokurador-Jeral Repúblika

Sua Exselência, Monseñor Joseph Marino, Núnsio Apóstóliku ba Timor-Leste

Sua Exselência, Bispu D. Basílio do Nascimento, Presidente Konferênsia Episkopal Timor-Leste

Sua Exselência, D. Norberto do Amaral, Vise Presidente Konferênsia Episkopal Timor-Leste

Sua Exselência, Monseñor Leopoldo Girelli, Núnsiu Apostóliku Singapura

Sua Exselência, Monseñor Francesco Cao Minh Dung, Ofisial Vatikanu

Sua Exselência, Monseñor Ionut Paul Strejac, Konselleiro Nunsiatura Apostóluka Timor-Leste

Reverensíssimus Padres no Reverendas Madres

Membrus Parlamentu Nasional

Membrus no ex-Membrus Governu

Reprezentantes Konfisoens Relijiozas no Sosiedade Sivil

Ilustres konvidadus,

Señoras no Señores,

Ho onra boot maka ami timor oan sira hotu simu Sua Eminência, Kardeal Pietro Parolin, iha Timor-Leste, Sekretáriu Estadu Sua Santidade o Papa Francisco nu'udar mós Legado Papal, ho ita nia delegasaun tomak.

Lori povu timor oan tomak nia naran, agradese Santa Sé ba Sua Santidade Papa Francisco, prezensa ne'ebé dignifikante aas tebes husi ita nia Legado Papal, iha okaziaun ida ne'ebé, hanesan oportunidade ida boot liu ba iha selebrasaun tinan 500 evanjelizasaun no kristianizasaun ami nia povu nian.

Ho ksolok boot tebes no ami nia klamar haksolok tanba aban, loraun ida ne'ebé Igreja Katóluka komemora solenidade Asunsaun Santa Virgem Maria ba Lalehan, no ami sei pariticipa selebrasaun Santa Eukaristia ida ne'e, ne'ebé maka sei preside husi Sua Eminência.

Nune'e mós ohin ita hala'o asinatura Akordu ho Santa Sé. Ho nune'e, maka sai duni faktu ida, hanesan momentu istóriku ba Timor-Leste, mehi ne'ebé maka Timor oan barak hein hela.

Mehi ida ne'ebé maka iha tempu naruk nia laran iha tiha ona, hahú kedas husi kontaktu ba dala uluk ho Padre Dominikanu sira iha tinan 500 liu ba. Lós duni, iha tempu uluk liu ba ita iha tiha ona Akordu ida ne'e, maibé ofisialmente komesa hahú hikas fila fali iha tinan 2006, nune'e maka ohin loraun konkretiza duni ho asinatura akordu hodi estabese, liu husi dalan jurídiku, relasaun entre Repúblika Demokrátika Timor-Leste ho Santa Sé. Aproveita okaziaun ida ne'e hodi agradese publikamente, ba instituisoens

Estadu sira nian ne'ebé envolve an iha prosesu ida ne'e no mós ba Santa Sé, koperasaun ho diligênsia sira hotu ne'ebé durante negosiasaun uluk hodi bele hetan assinatura akordu ida ne'e, nune'e mós hodi hetan autorizasaun atu ita bele realiza eventu ida ne'e iha territoriu liur Vatikanu nian, maka ida ida ne'e sai hanesan onra partikular ida ba povu timor oan tomak.

País jovem ida ne'e, foin maka independente iha tinan sanulu resin tolu, ho ida ne'e sai motivu orgullu boot, maibé ita bele esplika no bele entende wainhira ita fila fali hikas ba kotuk iha tinan 1515, tinan ida ne'ebé portugueses sira halo kontaktu dahuluk ho Timor, no nune'e hamutuk ho sira maka misionarius sira lori kristianismu no relijiaun katólíka mai iha Timor.

Tempu ne'e kedas, Igreja Katólíka iha papel fundamental ba konstrusaun ami nia identidade, iha ami nia formasaun no edukasaun wainhira atu sai ema. Ami nia beiala sira, iha tinan 500 liu ba no sira ne'ebé ohin lorin sei iha, hatene nanis kedas katak, ideais katolisismu nian, partikular liu ba iha nia valores umanistas, ami fo valor boot liu ba sira ne'ebé identifika malu ho ami hanesan povu. Armonia ho konfortu ida ne'e ami sente wainhira katolisismu hasoru malu ho ami nia kultura no konfisoens relijiozas ne'ebé iha, nune'e hasa'e no fortalese ami nia moris, no aumenta liu tan nia representatividade iha ami nia vida moris loron loron.

Hodi nune'e, maka Igreja Katólíka permanese iha ne'e no haburas liu tan iha teritorio tomak. Sira maka hahú loke eskola no seminário, ne'ebé kontribui maka'as ba sira nia servisu nobre ida ne'e, ho responsabilidade hodi eduka no forma timor oan sira barak. Ida ne'e sai hanesan baze fundamental iha ami nia evolusaun sosial, sai hanesan influênsia boot ida, maka liu tiha tinan hira, ami hetan autodeterminasaun no transformasaun hanesan nasaun.

Tuir período istória ami nian katak, direitu básiku ami nian ne'ebé ami labele hetan durante okupasaun indonésia iha tempu naruk nia laran, Igreja ho misionários sira hotu kontinua hela metin nafatin iha ami nia teritóriu. Sira luta ba ami no hamutuk ho ami hodi defende ami nia direitu hanesan ser umanu, no foti desizaun determinante ba konsolidasaun ami nia kauza hodi hetan independênsia!

Durante período resistênsia timor nian, iha Igreja maka ami hetan protesaun, iha ne'ebá maka sai hanesan abrigo ba ami hanesan ema ne'ebé frajilizado ho nune'e ami rekonforta no fortifika ami nia fé no ami nia klamar. Igreja la'os deit atu fó konfortu ba ami nia isin no ami nia klamar, maibé sai mós hanesan ami nia lian hodi haklekar ba mundu tomak. Maka nia dezenpeña papel importante ba iha ami nia luta.

Suas Exelênsias,
Señoras no Señores

Labele nega papel Igreja Katólíka nian ba iha konstrusaun ami nia nasaun, buat ne'ebé ohin loron ami ho orgullu sai hanesan: país independente ne'ebé ho persentajem populasaun katólíku aas tebe tebes. Ho prezensa permanente Igreja nian iha ami nia rain, funsiona hanesan elementu ida ne'ebé halibur no dinamizador iha luta povu timor oan nian, nune'e ami rekoñese no valoriza, maka rekoñesimentu ida ne'e hakerek iha ami nia Konstituisaun.

Evanjelizasaun povu timor nian to'ona tinan 500, ami nia Konstituisaun foin halo iha tinan 13 liu ba no agora dadaun Igreja Katólíka kontinua sai hanesan orientasaun, modelu, nune'e maka ba ami nia povu, Igreja sai hanesan apoiu boot ida ba iha edukasaun nune'e mós ba iha atividades ne'ebé ho karakter sosial, hodi promove valores umanistas aas liu, hodi nune'e kontribui ba ami nia dezvoltimentu nasional no atu reforsa no prezerva liu tan identidade katólíka ami nia populasaun sira nian.

Rekoñese ona importansia boot papel Igreja nian, tanba ho hanoin atu partilla hamutuk ita nia preokupasaun komum balu, maka dala ida tan hato'o katak, ami hakarak kontinua hala'o servisu ho parseria hodi oinsá kontribui ba dezvoltimentu ema nian, wainhira hanesan ser umanu iha âmbito sosial, pedagójiku no kultural.

Ita hamutuk nafatin ba iha kauza sira ne'ebé nobre, hau hato'o balun deit, hanesan dignidade ser umanu, inkluzo sosial, edukasaun, luta hasoru hamlaha no mukit nune'e mós ba protesaun meu ambiente.

Ami hakarak kontinua promove koperasaun ho Igreja iha ami nia preokupasaun kona ba manutensaun justisa, paz no bem komun, koezaun sosial no unidade nasional, hanesan mós ba fortalecimento valor populasaun sira nian, liu liu kondisaun esensial hodi kontribui ho forma ida oinsá bele iha vida ida ne'ebé dignu ho ba bem estar no dezvoltimentu povu Timor-Leste nian.

Ohin, ho asinatura akordu ida ne'ebé ita foin hala'o dadaun ne'e, hatur metin iha prinsipiu respeita malu, solidariedade no koperasaun hamutuk, no ho prezensa Sua Eminência Kardeal Pietro Parolin iha ami nia país, liu liu iha tinan ida ne'ebe ami selebra meu sékulu evanjelizasaun nian, hanesan representasaun hodi hametin liu tan relasaun entre Santa Sé ho Timor-Leste, hodi haboot liu tan valor istóriu ida ne'ebé maka ami sei la haluha. Nune'e, hau konvida atu ita hotu hamutuk foti aas kopu hodi fó brinde ida ba Santa Sé. Vida naruk ba Sua Santidade o Papa Francisco no halo votus atu Santa Sé ho República Demokrátika Timor Leste atu kontinua iha relasaun di'ak ida ne'ebé mak sei la kotu.

Obrigadu wain.

Dr. Rui Maria de Araújo
Díli, 14 de agosto de 2015